

四庫全書

集部

欽定四庫全書

瑤石山人稿卷四

明 黎民表 撰

七言古詩

中宿山歌

中宿之山如積鐵兩岸臨江不容竿
迴波撇漩恐行人峭石驚湍難挂席
土風雖惡山水奇丹檐絳宇橫江湄
福庭七十傳孔記犧尊千載經秦時
猿猴喜客擲山果

木魅窺人攢翠眉
陽開陰閉在頃刻
神淒氣凜令心悲
我遊萬里常經此
歲月崩奔逾四紀
寶玉應留沈宋詩
黃鍾不見軒轅子
矯首塵蹤欲卧遊
此山安得軒窻裏

梁園歌

我從淮陽來十日
苦風雨訪古登平臺
蒼茫見齊魯
平臺昔日孝王園
儀衛還同萬乘尊
周廬延閣通珍館
脩竹青池帶國門
四方賓客皆屬至
枚叔鄒陽最稱美
明月西堂作賦成
嚴霜曲榭稱詩起
榮枯翻覆那可常
左

君謀臣忽中傷日暮杵聲停故苑秋風葵藿下睢陽驕
奢豈辨當時事惟有憐才解人意門館荒涼誰曳裾川
原曠望聊停騎吁嗟行路良悠悠白日經天河漢流朱
輪自古多傾覆黃金底用如山丘

答戴常伯

我昔浮沈卧金馬傾蓋當時盡騷雅戴逵遇我情最深
一月新詩常滿把鵲原回首忽霑衣魏闕無媒此道非
已甘伏櫪同雞阜爭謂彈冠謁紫微長安騎馬希相識

朔風吹人少顏色窮途尚典鸛鵲裘泥蟠未有應龍翼
憐君結駟慰吾愁霜腴雪韭庖人羞劇談銅狄今誰在
遙指蒼梧望不流知君日下多恩顧奉輿執靶瑤池御
載酒須尋仲蔚居功成却倚將軍樹

鯉魚圖為大司徒三川劉公賦

誰剪生綃畫神鯉黃金作鱗丹砂尾大者矯健凌飛濤
小者啞喋隨波起赤日簸弄扶桑潮此魚有意排青霄
氣連海岱成膚寸勢挽天河注沃焦良工畫此有深意

不獨研機在山水君臣遇合將無同龍變雲蒸亦如此
燕市何人購此圖寶之不減雙璫璵持歸華屋生烟霧
條爾滄洲落五湖是日天高秋瑟瑟賓客滿堂皆動色
朱絃喜奏鳳將雛瑤階更叶蘭生日知是禎符不偶然
麒麟事業舊青氈佩刀王氏元名德經術玄成本象賢
腐儒亦解知英物看爾扶搖上九天

運丁行

黃河運卒何艱苦不值泥塗即風雨千里常行半載餘

得到京城半為土大車小車輪上倉官家却用大斛量
揀成顆粒明如玉復以風輪揚去糠倉中鼠雀盡張喙
片言不合輒笞捶入口沙泥尚不充掩骭單衣豈成睡
潛辭甲長暫逃歸忍使丁年坐顛顛人言自古從軍樂
豈知從軍亦太惡不如大賈浮江湖明珠滿載無官逋

思歸引

平生任性無羈束躡翼塵途成碌碌年時提槩隱閒曹
此日之官領錢穀祇謂朝叅遠國門豈知束帶無朝昏

問之幾馬不能對上林園獸都無言以茲筋力轉駕緩
安能驅逐隨車輪吁嗟叔夜無深識邴原辭俸過六百
我今蹭蹬胡為哉况乃形容轉衰白聞道故園初罷兵
薄田數畝可歸耕揚舲稍待桃花水策杖須尋漉酒生
夏仲昭萬竿烟雨圖為劉仲恭題

洋州墨竹曾傳譜東吳夏卿亦其伍常掃風枝及雨葉
世人往往傾貲取此幅離奇動萬竿烟雨嵐滅沒蛟龍蟠
碧鮮下拂彪池淺翠葆陰生洞壑寒天籟刁騷忽然起

水意山情落悲几窓前作賦憂金聲林下揮觴助玄理
煩襟俗狀借解紛始知不可無此君寫真已足輕尺璧
何況溪邊十畝雲願君寶之勿輕擲城南僦舍勝泉石
藉苔淪茗時展觀洗予骯髒風塵色

感舊篇答蘇子川

識君憶自公車日傾蓋論心若膠漆長楊羽獵揮毫賦
上蘭歌舞聯鑣出自餘風月嘗邀致興來每過蘇端室
華陽駿骨知在否樂生高臺未蕭瑟先帝乘龍去不返

小臣江漢扶衰疾君亦南浮入會稽欲尋台嶺營芝朮
當時席上幾才人世路艱虞各相失羅裳鈿翠為誰驕
隣笛哀傷事非一豈知日月重昭洗明堂再覩成周禮
更衣正叶鳴雞奏趨朝不待銅龍啓頗聞瀕海銷鋒鏑
復傳宮中罷角抵否往秦來理則然感時撫事空流涕
管鮑交情今已無驪黃過眼終難昧憐君日侍上方羞
笑余累索長安米風雲騰踏當奈何火色鳶肩猶旅邸
五岳山人歌贈陳玉叔之淮陽

君不見有虞受禪封名山五岳盤錯天地間金堂玉雷
雖迴絕便門徑路堪追攀真形混沌翕元氣竊之可以
超人寰恒宗風雨舜不到蓬萊波浪秦引還蜀嚴尚平
爾何者裹足乃欲窮孱顏龍伯大人顧而笑夸父僵走
誠可歎丹牀一秘幾千載側身長望阻且艱好奇獨有
陳夫子妙年歷落金閨士胸中雲夢吞八九周遊名勝
無難理虎頭盤囊穩繫身直鞭天上黃麟起手排閭闔
揮浮雲過都歷國尋常耳崑崙五城及在下焦原倒足

愁胥靡玉階歷上帝謂之齊州烟塵待網紀握節朝辭
金馬門單車夜到淮陰市東吳綺縞輸幾軸洞庭橘柚
來包匭徐關白沙河瀾瀾須君治之平若砥食梁刺肥
差可喜丈夫功名要礪礪卧遊不出軒窓裏

肖甫送至天雄故城因觀宋大觀五禮碑同賦

風吹古城勢欲倒征車北指燕山道道傍穹碑十丈餘
雨剥霜封卧青草我行拂拭開塵沙良工獨苦咸咨嗟
婉麗似出虞祕監廓落正類顏瑯琊金薤離披立蛟鵠

赤手欲掣生龍蛇誰其能此宋令主千載重操黑帝矩
宮中才人捧硯立殿前常侍登牀取白麻宣詔賜天雄
署銜紙尾紛華蟲凋鐫琬琰勒黃絹典雅尚有承平風
可惜龜螭半斑剥牧童燒焚牛礪角銅仙何日去咸陽
花石無蹤尋良嶽傳驂啜古不勝悲況是郵亭把手時
關門令尹逢迎處更說羊公曾過之

遇張元春

俠斜日暮紅塵裏揚鞭識是張公子春風大道控驂騮

明月西園醉桃李琅玕玉樹媚眉姿步上黃金未足奇
諸生解作東山詠才子邀吟輞口詩長裾懶作侯門客
掛帆歸訪專諸宅淋漓青壁滿題名牛衣勝卧長安陌

送洪山人從周謁張觀察塞上

雌伏長安市時人嗤瓠落一朝烽塵起褰衣赴戎幕枵
伽剎宇近邊庭槍壘風雲護井陘行拜將軍金鵲印還
披壯士曼胡纓自言白猿傳劍學匣裏青龍時出躍蠻
府媿隅解賦詩轅門烏鳥能占角韜鈴本自用才人况

爾風流入幕賓蒲類即看登計簿烏孫不久作藩臣陸
沈笑我栖金馬心期豈是悠悠者不辭酒肉似邱陵橐
鞬共醉垂楊下

送韓子成補三衢太守

君不見鳳凰羽翼何褵褕丹霄掣曳誰能羈丈夫磊落
負才氣遇合風雲自有時江左韓生稱國俊射策君門
名益振下筆偏窺左史書劇談合綰蘇君印曹郎待次
拂衣回管樂心情付酒杯十載幽憂纏橘市兩朝仙馭

上瑤臺疇昔論交幾人在一麾君亦思江海錢塘江水
日生潮嚴灘明月何曾改掛帆信宿且經過予亦青山
夢斧柯蘭陰之水葡萄渌襄陽小兒銅鞮歌腐儒豈辨
一生事黃金到手須快意揚雄祿位誠足輕相如肯與
公卿議濁水清塵自不同貧賤之交莫相棄

劉觀察仲脩酒後出芝杯飲客作短歌

劉侯喜客開華堂正逢三五明月光酒酣起舞欲為壽
夜深更出玄芝觴此芝何年入君手古色蒼紋如篆籀

金環覓得寧論直玉髓凝來不曾久纖手雕盤照顏色
滿座傳觀駭未識肯辭舉醕為君歡百年有幾開胸臆
劉侯玉署曾奮身早年骀駘辭風塵異物來作長生供
憐汝本是餐霞人窮途遇君顏色好析膽傾肝爭草草
交懽婁護豈足誇不飲公榮堪絕倒衰遲且欲息微軀
水宿風餐借一盂杖藜更擬攜籠去烟雨雷平正可鋤
西王母圖歌為陳侍御道衷母太夫人壽

瑤池渺何許蕩漾連龜臺琳宮貝闕相逶迤旭日倒射

輝蓬萊宮中之人衣絳衣左攜青童右瑤姬鸞苑鳳簫
儼先導天花萬片飄瓊甃娥眉蕭颯三千歲翠輦下頰
人間世青萃長瑣丹臺藉紫元曾授金璫祕謁來覽輝
南海遙雲林仙姥還相邀在傍笑者東方朔履上星辰
侍玉霄黃封屢給天厨醴錦綺親裁織女綃一上太行
停節旆幾回蜀坂住征軺茲日烽烟銷南斗斑斕起舞
尊前壽慢亭曾孫今幾代潯陽江潮清淺否檣書青鳥
更飛來年年勸進長生酒

唐寅仲卜居英州不遂竟歸作此慰之

唐生宿有耽書癖
早歲下帷窮鐵摘
賦就還稱八斗才
劍成自倚千人敵
豈知明月翻暗投
不覺青春易拋擲
去年辭我遊潁陽
南山水石為生色
芒屨行經碧落天
墨痕漬在雲華壁
山中未具郊卿索
道傍爭避朱公席
君有騰驤八尺身
何為蹙蹙羈風塵
爾非廣柳車中客
亦豈臯橋廡下人
勸君歸來且莫嗔
城南萬雉連通津
青翰翠被堪娛日
柳眼桃心競發春
割齒誰輕王粲少

曝衣難笑阮家貧舊時彩筆休輕擲此日河東賦頌新
同黃金之梁思立黃公紹陳忠甫訪安期生石室
白雲山下棲真室松逕何人訪黃石芳草猶尋舊日盟
棄繻千載曾書生野禪顧我所而笑玄鶴鼓翅鏘然鳴
林間木榻且安坐江上浮雲陰復晴岩前散髮者誰子
劃然長嘯為鸞聲興來枕藉向天地何暇坎壈較不平
崎嶇石路且迴車白日未落歡有餘登山臨水不盡醉
枉作高陽一豎儒

陳忠甫以叩竹杖遺予戲作短歌

叩竹傳奇西夏日腫節瘦莖如鶴膝天竺高僧屢護持
尚方靈壽差其匹陳君好事偶得之入手鏗然知古物
指麾銅柱開烟霏柱石羅浮看日出竭來載笠訪安期
怪石欹厓恐顛躓提攜似有蒼精翊閃爍應愁山鬼泣
偷視刀環未敢言笑爾青藜落吾室感君把贈意已多
置之座右勤摩娑只今滄海揚洪波馮夷出沒翻蛟鼉
微閭聚窟渺在望金堂玉雷空嵯峨杖乎杖乎奈爾何

畫菊為孫舍人以道賦

九月嚴霜風槭槭籬下黃花紛五色千枝結束艷明霞
一片叢生媚幽石略施粉黛人已驚淨洗鉛華誰解識
孤根獨立已後時歲晚馨香堪自惜柴桑三徑未曾栽
孤山萬樹長相憶舍人寓直披此圖斐几芸窗時拂拭
嫣然空谷迴春姿莫道佳人難再得

為邵長孺壽戚將軍

將軍昔佩金虎符洗滌閩浙清寰區上書不肯羈南越

撫劍直欲鳴伊吾廟堂宵衣思頗牧詔移內地衛神都
薊門坐鎮今幾載能使沙場成陸海投箕朝澄玄菟波
銜枚夜奪烏孫壘旌旂整暇號令嚴士馬懽騰氣逾倍
椎牛醢酒日從容翠釜黃封下九重邊庭數米知軍實
幕府程書上國功將兵不獨如王翦好士無聞似孔融
只今行年才五十冰雪肌膚髮如漆喜氣遙從海上來
明星炯向營前出仙籍青華紀筭多功名麟閣圖形畢
頗聞戲下盛才良借筋今誰是子房腐儒不識征西府

留滯空愧尚書郎願徯函谷封泥後劍履重看入未央

贈瞿生

齊安瞿生風骨殊騰驤七尺非凡駒十齡下筆薄史漢
握中往往靈蛇珠而翁頃者遭羈絃裹足灑淚來燕都
九關峨峨森虎豹白日朗照明區區肉刑末減逢漢主
檻車薰沐收夷吾豈為能言識黃雀亦是精誠感白鳥
嗟哉瞿生孝且賢珊瑚碧樹誰不憐琅琊小令人倫鑑
倒屣為賦長離篇我苦十旬始休暇不能羅致心茫然

采衣持節即遠道青雲干呂隨行船匣中蓮花光煜然
韜而不試神乃全用少正及中興年聳身玉立當雲天
遭逢不孤名下士帝師當時亦孺子

古墨齋歌

鍾王妙蹟世希有典型一代存仙手碑版當時走四裔
豈知摧折成枯朽負荷雖堪柱石才沈埋未免塵沙垢
英雄困頓亦如此石闕何知但措口誰其眴睠施旃推
李侯無迺其華胄松煤雪繭相映光春蚓秋蛇互蟠蚪

團圓陰魄如頑鐵錯落星辰餘北斗平生半世看墨本
灑淚臨風一回首沖騰紫氣初發硯匣之恐作蛟龍吼
所嗟指腕不相隨習氣平生今在否李侯瑰磊能攻詩
亦復解髮狂濡酒操筆應留紙尾書不覺神明頓還舊
願君寶此勿棄捐敗繒敝帚人爭售

書五嶽真形圖後遺朱汝脩

蘆灰一殺鴻水怒渾沌瓜分奠中土構形太素誰能知
西王竊之遺漢武龍拏螭泊真離奇鵠畫螺書安足數

封珪錫號徒紛紜崇侈無乃宋道君苔文尚留日觀頂
野火不共秦碑焚金門吏隱桃椎子早學丹砂悟玄旨
玉笈青囊穩繫身水懾蛟龍陸虎兕雲外天行自茲始
醯雞井鮒胡為爾

題黃山谷書黃龍禪師開堂疏

鍾陵行押稱第一早歲已入蘭亭室轉運應知腕有神
掣顙尤工老來筆學詩唯許杜少陵翰墨黃州迺其匹
宋人豈解識真龍天殿驂騑縱奔逸藉名黨錮疾如仇

白首黔陽作繫囚平生正得參禪力萬里危途百不憂
黃龍老宿爾何子槁目曾識東家丘相酬妙語千金直
能使芳名萬古流擘窠何人勒翠琰野火不肯焚銀鈎
何年榻本來燕市慘澹無人知滿字金門久客逢休澣
北牖臨風自粘綴髮短誰知心尚長側釐尚望君王賜
乾上人以鐵如意遺余作歌答之

吾聞壯夫一呌昆吾折大半精光猶未滅鍊為如意堅
且強鏤作盤螭頗殊絕宛若寒空千丈電冷如陰山太

古雪何年却入高僧手
魍魎見之應却走
有時舉向蓮花座
人天萬衆俱回首
羨師根塵久已除
身外尤物徒區區
知予頗解鴻都學
相招為署阿蘭居
空中一擲偶稱意
倒匣不吝牟尼珠
塵昏幸借指授力
攬結願與行藏俱
用之可代巨鼇足
小試肯碎珊瑚株
吁嗟人生電露真
須臾滿堂金玉非
良圖壞衣瓦鐵堪
為供綺障轉覺羞
吾徒

神鼎歌為任叅軍賦

神鼎何年出荆土三趾龍文形製古丹砂水碧紛爛斑
款識縱橫尚堪覩就中星羅六十字讀之箱口不能數
王在寒師命太史對揚王休周仲父戈鋌矛戟森開張
蛟螭離奇忽奔舞嗟爾神物胡為來中興撫運重明開
兩宮鼎食備厚養萬方玉鉉多良材千夫操畚築城下
富媪有意呈奇瑰琅函將發出紫氣石竈大吼如驚雷
牧臣盱眙詫靈異貯之為築中天臺衡霍呵衛驅罔兩
江漢洗滌傾尊壘予生好奇頗識字荒僻安能逢盛事

擗管爭傳王太令得寶况是任公子空勤索木勒千言
尚乏赫蹠遺一紙逡巡聞未獻明堂金薤靈篇尚祕藏
且罷山中采黃獨期君蚤晚發瀟湘

送本空上人西遊

圓師亦是吾鄉士少小出遊迷處所尋師忽遇清涼山
裏足不踏長安路持咒經禪閱幾霜知有慈親在故鄉
錫挂一袍迅飛鳥身輕千里不費糧白髮相逢不相識
雨泣含淒愬胸臆難將恩愛等尋常惟有無生堪報德

欲留橋井與比隣小築茅龕結勝因魔王瓔珞空持贈
長者黃金不貸貧白雲又指蒼梧道三月瘴江多毒草
鉢裏潛龍應避蹤水底鯨人爭獻寶機鋒妙說倒王公
登壇振鐸演宗風勿謂道安逢鑿齒須知玄度待支公



瑤石山人稿卷四

欽定四庫全書

集部

瑤石山人稿卷五

詳校官監察御史_臣曹坦

中書_臣劉源溥覆勘

總校官編修_臣王燕緒

校對官中書_臣吳甸華

謄錄監生_臣朱紱

欽定四庫全書

瑤石山人稿卷五

明 黎民表 撰

五言律詩

送泰泉先生赴南都掌院

舊跡紆皇覽稽謀藉老成
位因推雋起國以用儒榮
鳳閣綸為草龍門史作程
所希調鼎鼎延首詠昇平

粵臺山懷古四首

銅狄栖荒棘珠衣沒古蒿山迴秦壘在雲出漢陵高大
澤龍猶卧深春鳥自號雄圖將逝水誰與較蕭曹

京臺聊暇日四望柳條春象郡元吞楚龍洲自隔秦英
雄無窟宅戰伐有埃塵漢文寬大詔猶自感遺民

冷露沾瑤碣淒風斷翠華中原曾倚鹿荒澤自鳴蛙澗
古藏堯韭巖幽偃舜花隆坻聊永嘆林薄振清笳

風急俯層城烏烏夜角鳴河湟千里草駱越十年兵孤
劍時聞吼雄心鬱未平脩名何冉冉徒媿請長纓

送陳公聘

京華非遠地子去近明君
曉辨龍池樹春翔象闕雲
封章何日上旌旆此時分
天末多佳句因風寄雁羣

寄盛子才

離鴻發五嶺比翼間雲涯
春拂秦城柳秋乘漢渚槎
風塵憐玉樹江海思瑤華
憶女山亭夜空巖度落花

題子乾雙鶴

愛爾雙籠鶴昂昂在野堂
孤標能自許獨立亦何妨
素

翩逢秋勁清聲入夜長雲羅知不礙莫遣羽毛傷

神樂觀聽吳道士彈琴

和風扇楊柳古殿肅輕陰釋我樊中慮諧君方外心
鈞天疑度曲流水自成音恐別仙源去飄飄不可尋

遊西山玉泉池

圓渟知異脈方折紀靈蹤濯月金規滿含風石鏡融
平湖隱作浪曲澗瀉為淙一入昆明去千秋照綺櫳

香山寺

却月橫香閣，祠星隱紺臺。殿隨山勢轉，池向水源開。雙闕浮雲斂，千林返照來。鶴岑清絕處，心賞信悠哉。

長門怨

永巷疎恩幸，長門絕履綦。由來妾薄命，詎是妬蛾眉。夜雨銷蘭氣，秋風落桂枝。凝思君不見，含態入羅幃。

聞大駕南巡恭賦

君王遊幸地，江漢本朝宗。湘浦聆軒樂，昭丘訊楚宮。昔聞歡舊鎬，今見入新豐。徙倚看南極，俄成五色龍。

黃道天行速瑤圖睿覽紆萬方歸貢篚四海混車書問
道迴軒駕巡方奉舜輿非熊如入夢能載渭川漁

鑿道通龍輦疏山轉鳳輶柳當旂外拂花度憶前飄地
即橋山古津仍灤水遙皇情悲慟處松柏入青霄

吉日行千里征途駐六飛周廬聞夜柝旅帳正宵衣御
氣翔丹轂緋烟繞紫微祝融先做路何敢襲皇威

九廟神靈在鑒輿暇豫回徒勞賦黃竹祇見却龍媒鳳
歷占千禩鴻私下九垓懸知歌吹入高宴柏梁臺

東陳公聘兼懷盛子才

聆爾金閨贈思余白石歌共看楊柳暮相隔海雲多采
服依叢桂高軒映薜蘿椒潭風日美倚棹一經過
天南歸二鳥俱是鳳池羣獨立青冥外時來瑞聖君春
風搖綵筆夜月理玄文惆悵初陽洞相思寄暮雲

挽陳少謙

定交憐鮑叔解劍憶徐君總悵生秋色華池入暮雲潛
夫空有論封禪竟無文他日山陽笛重遊不可聞

除夕和惟鑒家兄

雨色淨遙天
華燈照四筵
氣催殘臘日
花發艷陽年
冷
蔬融殘雪疎
枝帶暖烟
春明好行樂
莫忘棣華篇

再遊西山

爽氣朝仍在
乘春偶獨過
雨稀芳桂少
山密夕陽多
粵
鳥愁燕土南
冠賦楚歌
憑軒無限意
流涕滿巖阿

出塞曲送陳公聘使邊

騁望白狼間
追兵大漠閑
黃河通月窟
青海入天山
剖

竹行秦壘封泥守漢關
豫知麟閣上先候策勲還
鳴笳發隴首建節望河源
莫以邊功重能令中國尊
名王應膜拜渠帥會宵奔
早獻安邊議歸來入薊門

過儀真訪譚子羽留酌江霞館因贈

榻下高人宅飛觴夜向分
門臨揚子渡窓隔蔣陵雲
鷺嘯因風起漁歌送客聞
江潭無限恨瓊樹思氤氲
留滯周南久川程倚棹過
江流經楚盡嶺樹入吳多
興為悲秋發情如惜別何
津亭明日路相望隔烟波

留都

鍾阜鬱嵒堯河山望不遙神宮侵日月輦路上烟霄弓
與龍髯墮筌隨鶴馭飄金鳧知不滅絳節下朝朝

六寓神猷煥三垓睿覽存鑄金成九鼎剪葉建諸藩玉
厯調元氣瓊枝蔭本根叨逢中興日不改舊乾坤

成龍占王氣遊鳳記高臺山色荆衡盡江源巴蜀來廟
謨資一德天險仗羣材壯觀今如此中流詎足哀

銅爵標霞外金莖擢漢間祥基開白水御苑跨黃山殿

古宵鐘徹花深委佩閑蒼蒼後湖月應載鳳遊還

紫署招延地時髦盡逸羣
鵠京陪湛露韶舞續卿雲秀
抱江河潤先生草木文
菁莪今日化慷慨憶殊勲

伊昔風雲際誰依日月光
鹿窮歸歷數龍變化侯王俎
豆丹青裏江山劍戟傍
鉛刀思一騁流恨向宮牆

水府荒南國江津控百蠻
登秋來橘柚踰海貢琅玕
歲月龍編遠風烟鳥道寒
朝宗真此地王會萬年看

幽薊稱巖甸重襟亦在斯
尚紆南顧策數費北門師
霜

悴青苗盡秋深赤羽馳誰能如賈誼流涕向明時

登雞鳴寺

寶地空香散金繩覺路賒樓高礙白石軒密密青霞綠
泣臺城草紅悲辱井花江山今幾劫非獨有恒沙

駐目憑虛閣神思迴欲飛雨驚黃葉散磴繞白雲微鐘
簾千秋在豪華六代非曇花無住跡頓染客遊衣

送李少階尹嘉興

君向東吳去幽尋興不違水田青稻粒遊女綠荷衣問

俗紆玄綬裁詩坐翠微
趨朝須及早莫遣雁南飛
製錦榮新秩還鄉是畫遊
彩雲辭鳳闕僊蓋彌麟洲
身繫蒼生望符分聖主憂
江南民瘼甚應為達宸旒

和子乾遊浮丘

海上仙山改人間
幻跡留鼎猶烹白石霞
自媚丹丘瑤草期相拾
璇房得並遊采芝人不見
惟復挂巖幽

夢中作

春殿徹宵鐘
千官步輦從中林
親射鹿瑤水遠乘龍柳

外笙歌發花間紫翠重周南留滯久何日待東封

瑞雪

午夜蟄靈祈千官匝紫微望雲車蓋合度曲鳳凰飛皎
潔隨紈扇淒清炫玉衣侍臣裁郢曲轉覺和人稀

瑟密因風度嚴城迴不譁入林俱綴葉粧岫詎成花積
氣浮瓊島流雲結素華盈車占上瑞持此報皇家

題玉屏墨莊

淨業臨丹壑高居擁翠屏雲光過沼白山色入池青獨

鶴將人靜閒門共月局安知灌園客不是少微星

蘭沼碧沈沈微風生樹林遊魚避荇葉食鳥下蒲心徑
狹牽衣袂巖虛應足音知君數來往應不倦幽尋

隴蜀平分處風烟迴不迷斜陽褒谷口古樹漢壇西泉
石經龍卧烟蘿拂鳳棲何時紆俗駕從爾問丹梯

過盛子才館

花林同載酒幽客重相尋春事連三月鄉愁攪寸心草
青臨浦盡雲白到江深莫忘還家路緇塵易見侵

擾擾復依依閒來此息機一驚春草綠再見杏花飛楚
老懷瑜泣齊門抱瑟歸五陵珠玳美誰復念牛衣

真州旅館小樓望江南

江臯飛雨至羈客易潛然稍濕汀前草微生樹杪泉舟
行移遠岬帆過宿孤烟偶動鄉園念知忘課林田

同行諸公渡江予獨留真州

飄蓬轉歧路歸夢繞丘園落日天邊盡孤雲海上翻汀
蘭看漸歇徑菊別應繁誰念分儔侶殊方獨閉門

答譚子羽

三年書少至萬里興難乘暫爾忘乖別從前廢寢興夢
回芳草積愁入夏雲蒸待爾金闈去思予卧茂陵

延清館小集和子乾

蓬徑初延賞空齋獨爾思酒深寒夜酌梅發早春枝浦
外流雲裊城闌上月遲莫緣風共雨長負此幽期

送何郡博遷信宜尹

初散槐陰市還過嶺嶠東地應隣合浦人更美文翁縣

靜山容媚官廡海錯豐雙鳧難久滯早見入丹楓

長汀李大尹挽詞

美政推榆次芳名擬峴山祇聞攜鶴去俄見泣麟還荒
壠松楸古平原橘柚斑夜臺埋劍氣猶照斗牛間

一從淹建水無復畫麟臺學有雕龍辨人非展驥才茂
陵長卧病栗里竟歸來往事穹碑在松風起暮哀

桐廬道中雜詠

宿雨朝來歇山雲尚接連芙蓉亂越渚杭稻滿吳田有

景拚為客無機任似禪鄉心雖強制猶廢夜中眠
結宇荷為蓋編籬槿作扉野晴乾鵲噪沙暝水禽飛牽
路緣青壁樵歌出翠微滯淫非客意山水自忘歸

谷口條風改江中暮靄沈雲山招隱興京洛倦遊心緝
芰香盈袂聽猿淚在襟客愁容易老星鬢莫相侵

失路人爭厭羈遊興獨緘已捐湘水袂還進赤亭帆水
急流紋聚峰高落日銜青山如可買來此卧松杉

釣臺

垂綸人去後樓閣緬縱橫龍卧滄江晚鴻冥芳草生水
猶喧野碓風自落柴荆物色真虛事知君不重名

豫章江行

綠篠迷荒岬清溪下亂流可憐聽雨夜強半為花愁囊
已無金錯衣猶擁黑裘翻悲生計拙不似釣魚舟

千越通津處青山匝岬多鷗來搖水鏡鴻去避雲羅釣
柵依蒲柳行舟觸芰荷本無浮海志乘醉且狂歌

路已經吳越舟還溯豫章洪濤撞遠岬獨鳥下危檣地

近長沙濕山連粵嶠長所思非遠道猶復歎殊方

呂仙福地

烟霞千仞閉滄海幾回枯碧甃流丹汞瑤壇上綠蕪溪
深人過少松暝鶴來孤願探琴心妙藏身向玉壺

少壑為蔡山人賦

林園無外事一榻類安禪翰墨塵悰少衣冠古制全市
朝容大隱山澤儼儒僊更欲逃名去知成內外篇

玉筍峰頭景還專一壑竒山巒隨鳥勸澗戶有猿窺問

字多攜酒尋僧不廢棋雲房招隱處誰共此幽期

踰嶺

蕭颯風塵鬢棲遑幾入關蹊迴還有徑林盡轉多山無
論鳴騶入欣隨望氣還不知緣底事容易損紅顏

彈子磯

茲嶺何綿亘孤根下杳冥雲光盪鳥背水氣雜龍腥蜀
道攢為閣廬山疊作屏定知人靜後風雨語精靈

香爐峽

重林遙蔽日羣峭上摩天蜃氣何憎萃猿聲更接連雙
娥行雨廟百丈上瀧船遠道應愁絕鄉園若箇邊

久雨

秋風吹暮雨蕭索滯空城窓隙應妨入簷虛不絕鳴稍
侵書帙潤更益研池清一榻容身外浮雲未足營

空齋長晝掩於世頗無機一雨野池溢千山黃葉飛林
僧看竹少園客負樵稀試問浮生裏蘧蘧幾是非

愁霖淹別墅朋舊解招攜竹偃侵花徑欄傾礙鶴棲苔

生吟畔石蟲篆壁間題佇待晨曦至腰鎌課林畦

容菴黃公挽詞

名高魯單父孝掩漢黃香絕學箋蝌蚪清朝詠鳳凰乞
身書太早憂國髩徒蒼賴有中郎筆新鐫古道旁

省署捐華要山樊適性靈身齊漆園吏人授濟南經紫
氣龍泉掩玄堂馬鬣年年椒糈奠圖象在丹青

寄丁戊山人

高情憐博奕幾度宿芙蓉瓊樹海雲隔瑤壇風露重晨

餐憩危石旅服入深冬後夜聞笙處知從紫蓋峰

玲瓏石

險類天門鑿竒方日觀懸雲移根尚濕雨滴溜成穿偃
壑知靈草窺窓有瑞烟可憐醒酒處樹木舊平泉

八月兵入京師十月廣州始得平安消息

京華愁獨坐蓬徑輟相期驚鳥南枝怨飛鴻北地思龍
庭悲鼓角鳳野見旌旂此日江湖夢偏懸六月師
插羽喧邊郡遊氛薄帝京士皆輕死戰將祇重橫行馬

上青娥慘腰間寶玦明生靈爾何苦會見掃欃槍

氣倍臨軒日風生授鉞時九邊森虎旅七萃起魚麗選
士皆穿札徵兵盡死綏聖謨真不戰關塞偃征旗

幽薊襟喉地邊兵造次來雁門無李牧馬邑有王恢故
壘秋陰澹清笳落日催勒銘麟閣上應待出羣才

午夜聞班馬清朝遂解圍風塵雙目短消息萬方稀保
障逾青海宸居正紫微柴門候遠使喜極倒裳衣

同易道人過需上人山居

支公禪觀處密義許相酬
白黑雖殊致玄無本一流經
翻踈樹下茗宴曲池幽為問
浮生裏何人得此遊

師曾訪道去言至伏牛山
殘雪經行苦深林乞食艱
心花晴自湛身界老終閒
一衲雲峰下秋來獨閉關

過鶴舒山人別館

却掃元非病齋心欲斷緣
殘年惟翰墨虛壁祇燈烟
夕露滋團菊斜陽下冷蟬
漢庭今重武誰好子雲玄

泰峯為劉處士作

習靜空齋裏瞻奇仰泰峯白雲流絕壁黛色隱寒松寺
與茅簷直門經竹崦重夜來清夢覺還得聽晨鐘

從化山水六詠

羽駕今何往丹梯迹尚存竊藏金粟暗書積紫苔昏秋
水淪粧鏡春風掩洞門空山人不見白露濕蘭蓀

右

劉仙巖

片石橫江滸危亭駕沈寥山烟初冪樹溪水欲平橋遊
女思捐佩佳期托采蕭登臨意無限猿猱響山椒

右

石鼓樓山

山色晚幽幽清溪獨放舟輕風低舞蝶急雨應鳴鳩雞
犬桃花坼人家杜若洲故園春服好應不厭經遊

右

曲江

為有雲房約來探不二門雨花臨近砌山翠落前軒讚
佛還聽偈看心本息言未能超忍辱聊此滌煩喧

右

太平寺

側足應防險沈竿詎測深神珠浮沼面寶劍墜潭心草

樹涵秋碧烟蘿翳夕陰欲知霖雨意膚寸起遙岑 右

龍潭

遠岫橫丹穴危梯倚玉虛長生留秘訣清隱閱仙書
烏本鳧飛後羊知石起餘滄桑那可測惟見化城墟 右

楊溪洞

嚴何二子約予與易居士會海珠不果有詩見詒

奉答

靈氣方予愧真緣子獨深片雲凝野思明月寄遐心羅

網鴻飛急烟霄鶴去沈瑤臺知不遠同爾一追尋

丁戊山人再至予適泛海歸

捨舟俄見面素髮忽相侵縱有逢君處知無住世心身
將靈岳遍性入梵緣深莫動歸興與丹丘即故林

童御史仲良謫官南海偕隱士劉安元來遊傾蓋
驛亭率爾貽贈

已向青門隱欣從白社遊乾坤為一馬身世在虛舟海
擬張融賦丹從葛令求肯憐離索意來訪桂巖幽

槐里歸來後蒼生尚繫思
史曾書直諫人久挹光儀
踰嶺愁風熱攜家渡海遲
想承前席問還在中興時

五僊觀鐘樓次劉安元韻

飛樓延倒景徙倚聽鸞笙
樹並孤烟聳山當落日橫
滄波終不極天路此時平
未論求仙去深杯且共傾

十五夜同丁戊山人集泰泉先生宅分得深字

行雲隱明月華燭散輕陰
南國詞臣第東遊海客心
坐憐寒漏短閒愛夜杯深
更聽霜空鶴翩翩送好音

同梁思伯訊陳貴吾卧病

怪爾經旬卧踈燈對影孤藥曾因病識身豈為名拘歎
逝從星鬢安貧任澤癯莫愁過往絕人自訪潛夫

上丁日拜梁文康公祠

畫閣春雲裏叅天翠柏圍虹光留寶冊風雨動靈衣扈
聖天心眷回鑒火德輝留侯名冠古能託赤松歸

聞梁公實得請南歸

天地干戈滿風塵信息稀暫辭青瑣直遙望白雲歸種

秣堪為酒紉蘭可作衣
蹇予猶負米慚爾息塵機

望思伯不至

北闕書難上南荒路不通
爾仍淹水宿吾已倦沙蓬
夢寐風波外交親意氣中
帝城知己絕何處託梁鴻

同吳而待楊挺秋朝天宮萬歲山登望

陟勝緣芝嶺尋幽過竹房
帝鄉雲冉冉關路樹蒼蒼
葉應空齋磬烟叅畫閣香
玉壺偏可狎何必淚沾裳

吳舍人內子輓詞

鸞鏡俄朝掩蘭閨
遂夜扃路塵昏柳
翠山雨泣松銘精
衛魂終在潛英夢
豈靈空餘潘岳賦
惆悵不堪聽
詎是朱顏改還悲
白髮催未聞封石
窳誰見返瑤臺瑟
共湘靈鼓舟從易
水迴江離應可薦
詞客有餘哀

秀林亭為王舍人桓賦

風烟塵市隔花木
俗情疎閒愛尋漁
艇靜宜看道書岱
雲翻迴野泉水灌
清渠羨爾高齋客
持觴常晏如

秋雨夜過公實

急雨驅殘暑蕭然夜掩關秋聲過亂竹涼氣殷空山紫
署君期入青門我暫還庭前桂花發曾憶幾人攀

懶性過逢少襟期祇見君雄心頻說劍清夜且論文露

早蟲偏切風高雁數聞便應欹枕卧時事日紛紛

隱几不成寐蕭條來朔風高城翻落葉遠浦滯寒鴻意
愜新涼後杯深永夜中因君愛疎散三徑數來同

招梁彥國仲登二子

江湖羣盜滿搔首歎離居舊好誰憐子新篇獨起予風

前停野酌雨後剪春蔬不負山陰約柴門更掃除

拙清樓聞笛

窈窕邊城思隨風下隴頭數聲山石裂一曲暮雲流候
雁霜前苦江楓露下愁庾公多逸興今夜在南樓

歐楨伯招余過草堂不赴

擬尋雞黍約遠赴故人招落葉千山暮孤村一水遙天
寒收橘柚歲晏罷漁樵未得同攜手新林過板橋

和中閣山人守歲

寒雨轉霏霏更長燈燭微風塵孤劍在江海十年歸短
計惟收林清時屢食薇相看春色好花竹滿林扉
列炬照前庭分題尚未成風烟稍欲斂河漢淡將傾短
褐南山夢長纓北闕情行藏俱莫問披豁任吾生

藥室六詠

未暇浮滄海清思一室中餐霞歸絳府食柏變青童采
藥幽禽導棲心靜者同方知靈骨異飄舉欲乘風
結構綠蘿陰端居懷古今豈能隨橘性暫覺遠蓬心亞

樹猿爭果窺窻鶴應琴世途俱冥絕唯有羽人尋

上士遺丹訣中年遣世情九光飛素鞅五岳煉真形緩
步隨罡斗齋心禮太清自能超浩劫何必訪蓬瀛

卜築雖方丈青谿合自然壺中乘倒景枕內叩靈篇龜
腦方和藥龍胎定假年從來山澤裏別自有儒仙

金門雖可羨雅志在玄虛身世了非我琴尊不願餘行
吟朱實落散帙綠陰疎幽獨園居懶尋山或起予

山林成獨往未覺興情孤作賦懷嘉侶忘言據槁梧冰

肌仍綽約金液豈凋枯始信風塵外藏身有玉壺

別黃幼章南歸

客程猶萬里旅服已三春倦馬風塵色離觴江漢人病
無吟落葉愁復泛長津白壁誰持贈還家慰所親

贈王文純

玩世吾應拙逃名爾更迂夷門人豈識燕市酒曾沽白
首矜然諾黃金信有無歸來江海日能闕

潞河風雨驟作

自笑浮生拙飄飄信客槎
波濤翻陸海風色慘平沙
岸圻應防燕林昏不辨鴉
江湖成穩卧無夢到京華

黃子鋪

京塵猶未遠野落自蕭騷
田父頻驅雀居人半帶刀
牛羊斜日下蓬堞朔風號
苦憶南窓下壺觴只自操

董子祠

古廟丹青在幽人此重尋
浮雲碣石外落日廣川陰
壁尚藏書古庭猶積草
深因憐不遇者此地倍沾襟

狼口阻風

斷岸悲風急停舟濁浪深
千山低野日孤樹繫春心
客

邸頻炊玉行囊屢探金無能慰離索箕踞向秋陰

同徐郎中吳給事訪李使君郡齋得雷字

故人千里至落日一尊開天合孤城雨風驅大

闕

劍豈應孤

歌風臺

萬乘威靈遠千秋伏臘思古牆陰薜荔寒雨濕旌旂湯
沐山河在光華日月垂豎儒逢世難流恨大風詞

集姚元白市隱園

江山餘故國水石到名園草色幽亭合雲光曲沼翻狂
來猶說劍亂後此開尊一罷濠梁詠襟期誰共論

題余伯祥河亭

高齋開白下疎樹倚青溪竹露秋逾滴山雲晚漸低漢
京班氏學剡曲戴顓棲念爾風流在令予戀解攜

過黃淳父旅寓

烽火不堪論相逢但酒尊悲歌同易水長劍去吳門世
事窮愁過貧交古誼存銷魂憐此別江路聽清猿

姚園席上贈吳山人子充

劇談修竹裏共指白雲期四海無家日千山獨往時故
人蟬冕貴久客髭毛衰欲把吳鉤贈飄零念路歧

永興寺訪吳僧福懋

斂屨穿深竹牽蘿過石橋僧來經茂苑寺古記南朝暫
住因烽火將歸駕海潮誰言緣易斷翻遣別魂銷

同黃淳父登雨花臺

高座翻經處捫蘿試一登羣峰當暮斂萬象入秋澄樹
色分蕭寺松風起漢陵傷心烽火日樓櫓在西興

過陳時億兄弟留酌石亭先生之子

江左應才窟三株獨出羣交情原白首器業自青雲萬

事銜杯失千山把劍分龍門吾敢託生已後陳君

避兵青陽將軍灘

已是愁風景兵戈復路難鬢毛今日變衣袖幾時乾山
水還鄣郡奔亡自楚冠酒樓蕭索盡誰遣客愁寬

送林元育之仙遊

何氏乘龍處芳湖澹不流烟霞異人境鸞鶴下真遊扇
枕黃香戀巖泉謝客留石牀須汛掃吾欲訪丹丘

送蘇仁甫之永安

君去延平郡傳經有舊蹤青山藏九島紫氣抱雙龍傲
吏當清世閒曹擬素封裁詩多暇日能寄海雲重

同思伯將遊石室山經石門作

秋風搖落後水國掛帆遊壁壘成千古江山空四愁浦
雲移遠樹汀月送行舟不用歌叢桂王孫自滯留

泊靈洲寶陀寺

荒亭圍樹色孤石攬雲根野水寒侵岬漁舟夜到門霜
楓閒共倚沙鳥靜聞喧不寐看山月秋聲滿給園

至三水江雨驟作

雞犬依茅屋魚蝦集市門
峽山高浪隱桂水細流喧
雨枕聽更卧江船把酒論
丹梯知不遠飛夢躡崑崙

渡峽

滄江流正急山勢劃中開
絕壁交青竹寒冰滴翠苔
樹翻棲鶻動藤接飲猿哀
不為耽形勝能無夜雪迴

嵩臺

景絕因江會樓高更得名
山迴到海色樹殷落潮聲
日

影朱旗直風含白氊清憑闌聊引睇誰悉古今情

宗呂二牧宴於孝肅堂

詞人今岳牧能吏豈閒曹象郡烽烟淨龍門氣色高
清尊開暮雨虛檻俯秋濤不共南樓夜誰知庾亮豪

尹明府雨中邀飲

漉酒能留客柴桑意緒多疎花明雨檻高棟隱星河
簷雀窺尊喜城鴉接翅過不愁霑濕重餘潤入烟蘿

宗呂二牧邀遊石室山

錦石分瓊島蒼山轉碧流巖泉高迸出雲木曲相樛
絕應防馬岨懸穩繫舟謝公今在郡何似永嘉遊

騫飛心屢動迴複意空迷山勢移舟失雲光避席低黃
花粘岬細錦樹得霜齊風起長林暝清尊未解攜

金牀何窈窕玉乳細堪捫苔蘚深題刻風雲出洞門幽
仙悶絕景弱水斷孤根服食留真訣惟應靜者論

山水何來暮賓遊賴此同波濤恐謝傳風月醉山公竹
日停深翠楓霜倚薄紅清笳莫更奏簫鼓出巖中

宗呂二牧復飲餞於嵩臺書院

誰言千里別復此一尊留意氣深投轄聲名起共舟風
江宜晚泊雲嶠罷東遊一掩蓬蒿徑蕭條桂樹秋

唐寅仲以李公麟瓦研見遺謝答

一片陶泓質曾經洗玉池文章今日事模範古人師雨
濯金星出苔侵玉筋歌連城何用假投贈比瓊枝

風汎崇蘭圖

在室偏同氣當門偶自防祇憐幽谷性莫歎後時芳作

佩馨彌久裁書葉正長佳期頻悵望南國有微霜

楊祠部宅送陳玉叔之淮安

故人遙擁傳炫服且還鄉芳草經吳綠清淮入海黃離襟分夜月官燭照西堂祇益風塵夢隨君郢路長

瑤石山人稿卷五

欽定四庫全書

瑤石山人稿卷六

明 黎民表 撰

五言律詩

答吳明卿見寄

兵起黃河日余歸嶺嶠時風波一失勢歧路轉相悲白
鹿成長往青雲恐後期羅浮故無恙來把桂松枝

同歐楨伯梁思伯遊西樵山夜宿浦口

近戍津亭暗遙村獵火孤秋風吹日夜客思滿江湖夢
怯魚龍起愁聽雁驚呼蒼茫問前路吾已愧長途

鐵泉庵

鐵壁臨千仞乘危更一探瀑前安茗竈松杪出花龕鶴
憶窺殘帙猿經伴夜談誰能開丈室招隱南山南

翠巖在碧雲村外

青山開斷岬千尺下嵌峯風起碧雲亂虹流白日陰藤
蘿爭裊綴魚雁悅高深縱有桃花發應無俗駕尋

下山復題雲谷書院壁

何年招隱地，綺構出林端。
石磴蒼烟濕，雲門白雪寒。
地因霞外僻，天到谷中寬。
有約重攜手，高臨百八盤。

同吳而待張中卿兄弟過崇勝寺

一徑遠塵囂，孤峰坐閭寥。
霜林依斷岸，江浦入寒潮。
草自香臺積，花隨寶勝飄。
禪心無起滅，持鉢過清朝。

寄劉安元

戎馬關心日，誰能問隱居。
想過天竺寺，還著茂陵書。
鴻

雁經年至風塵兩鬢餘梅花難遠寄吟望獨愁予

遊羅氏園池

芳園窮落日山水有餘懽
早歲知懷橘清秋共握蘭
風烟向浦盡花木隔池看
為戀幽巖桂塵冠且未彈

同楨伯泛芙蓉溪

錦水經寒淺扁舟任興行
幽花兩岸紫殘照一湖明
游女行歌艷漁翁對影清
芳洲多杜若褰望若為情

梁少傳館詠拒霜花

簇簇繁霜朶深秋開正齊纖濃隨落日結束對幽棲客
屢停盃坐詩頻摘葉題試看臨水處何似若耶溪

少傅期集琪林徐道士館得青字

采藥何時返垂風此暫停入門桐樹長到院薤叢青碧
海藏城市瑤壇見日星過逢元勝侶能為寫黃庭

心遠亭聽陳公載彈琴

阮公操綠綺梧竹對高閒白雪流深壑夕陽明遠山幽
襟散物外餘響出林間興到悠然處披襟未擬還

送谷子遷還姑蘇

萬里尋師去滄波肯暫留
嶺雲經古寺江路入新秋
瑶草應堪拾丹砂不易求
歸逢明處士沽酒話羅浮

泛石門溪

往來皆任興屢進石門溪
雨氣籠山淺江雲過鳥低
稻田多汲竹松火更蒸藜
雖共漁翁宿桃花路却迷

劉僊壇

羅浮雜詠

坐出千林杪壇荒累劫餘
烟霞歸內景天地入蓬廬
白

石留禽戲蒼筠篆鳥書無能探蒞笈歸路獨踟躕

朱子菴

靈飛超浩劫珍館寄幽尋水引山門遠雲藏磴戶深青
精堪度世白日此修心洞口風雷起鸞笙下翠岑

黃子書堂

白業留孤墅青山蔽數椽鳥曾迎木客花更挹蒲仙瓢
掛縣蘿壁茶烹滌硯泉猶疑散髮處長誦紫苔篇

彩雲軒

欽定四庫全書

闕

卷六

翠向人開

暮春張考功助甫邀遊韋氏園時梁舍人思伯偕
至

遠眺山河盡孤吟水竹偏高雲攬樹密野日避花鮮徑
石歌相帶巖房曲對懸貪竒收客淚留醉夕陽邊

勝事傳韋曲幽尋我輩能臨風觴酌緩落日興情增畫
壁逢僧問丹梯引蔓登故侯應不賤瓜地有東陵

大野臨燕趙躋攀意自豪雲沙千堞暗松柏五陵高西
日愁相對南音醉懶操菟裘無處所彌覺此生勞

脫帽當松頂移舟傍竹陰豈知青瑣客還有綠蘿心思
苦詩篇警情忘酒盞深寥寥山吏部千載此知音

林壑晚逾勝，風塵遠暫忘。
物情嫌骭骭，吾意在耕桑。
敗葉蟲行篆，濃花密占房。
浮生堪濁酒，窮遠任蒼蒼。

列岫當空倚，三峰近席攢。
碧滋苔蘚色，陰益石池寒。
日費壺中藥，天遺象外觀。
却疑幽絕處，堪掛野人冠。

海柏南方得名花，上苑移露添垂徑。
實風亞出牆枝，采摘情都盡。
飛騰意轉遲，芳菲應可惜。
停騎待成詩。

布地千金積，邀懽一徑開。
花光搖解佩，荷氣送行杯。
水感昆池動，雲移碣石來。
飄零猶壯觀，肯作雍門哀。

芳園爭倚並幽事此中多時序花飛甚身名老去何天
遙金馬署星動白鷗波我去尋黃綺相思在薜蘿

過姚上舍伯子草玄亭

憐君花樹下復有草玄亭山色牆頭出宮雲雨後青聽
鶯移遠杖相鶴檢仙經誰測風塵裏沈冥有客星

官舍雜詠

多病年方覺清齋日頗長槐陰閒閉閣竹榻靜焚香宿
鳥爭移樹疎花不過牆幸無塵牘擾幽事足徜徉

懷紱初為吏修心未到僧流年穿木榻長夜伴燈檠懶
出從題鳳慵書誤畫蠅款門逢酒伴勝飲玉壺冰
蘭省雖清祕蓬扉自沈寥編籬多綠槿間樹出紅椒客
至常班草觴餘自掛瓢茹芝聊復得空費鶴書招
不堪驅世事祇足稱閒居叩齒清朝過科頭累月餘牆
隈常置筆帳內苦無書雖羨侏儒飽終年免負鋤
知有看花約春朝更不眠蓋多從雨借屐自上山穿得
俸寧供醉謀生亦任天校量終歲裏常在習池邊

官箴渾不解俠氣頓能銷素髮嗟垂領紅塵屢折腰世
情飛絮過鄉思斷蓬飄為甚抽簪未山中少藥苗

灌園常不仕沿牒偶為官夜宿芸香閣朝看苜蓿盤草
玄能尚白鍊骨未成丹終擬藏名去牆東老鶻冠

潦倒時堪棄清狂自懶醫生涯千日酒歲課五言詩倚
樹常趺坐逢人或解頤汗青吾豈敢賴有子雲知

雖然稱校理筆研久生塵白虎多同異金門自隱淪桂
薪從度日榆英又殘春斟酌浮生理須尋漉酒人

高枕從吾拙，卑棲樂性全。豈無併澣計，不受綈袍憐。野客猶分俸，當壚更覓錢。管絃何處樂，夜夜似西天。

紅葉侵階出，青楓夾陛飛。春風開紫閣，月朔擁朱衣。端拱封書少，清關接士稀。驚心垂象下，江海客星微。故山多勝絕，歸夢不須占。竹長成高格，松青墜古髯。種園芝自給，煮石火頻添。何日拋簪紱，迎暄在短簷。

同吳明卿遊大覺菴

風塵不入寺，花木自為林。赤日清涼地，青山吏隱心。古

藤垂屋角獨鶴占松陰車馬長安客誰能向此尋

張肖甫宅餞別高右丞伯宗得杯字

長安殘雪後復共故人杯揮手關山遠離心歲月催樓
船過灋浦羽獵上京臺應念遊梁客金莖首重迴

張肖甫洪從周過款山房

天涯殊物候猶未換春衣花事看將半故人逢漸稀過
雲傳旅雁乘月啓山扉幸有尊中酒能忘賦式微

同肖甫夜宿龍華寺

曲水通龍沼荒塍次鹿園風塵湖外斷雲氣島中騫靜
院鳥雙下寒檠客對言誰知朝市裏叢桂得扳翻
相期禪客話高枕白雲層月色千江水山門七祖燈鐘
聲散落葉壁影挂寒藤欲續良宵興塵勞恐未能

郭山人次甫從東海來將遊北海留止軒中因贈
雙屐帶莓苔新從日觀來山川遊子夢風雪故人杯龍
性應難馭鸞情不易媒莫言成獨往高浪駕蓬萊

采藥三年別乘風萬里遊可憐叢桂約又過菊花秋大

夢君先覺多岐古所尤魯連空蹈海何似駕蒼虬

陳侍御道襄招朱陳二使君同集

雙鳬猶暫駐驄馬復同遊入夜城陰靜將春雪意收月
曾千里共興作兩宵留何處吟莊烏淒風起鳳樓

溪南別業為萬考功言卿賦

自有山林性能將物我齊剪茅成野徑披荔待幽棲輞
口茱萸泝芳洲杜若溪何當接衡宇琴酒日相攜

日暮鳴橈去溪流幾許深自隨明月往應少世人尋水

石含幽意魚鳧識賞心
漆園元寄傲何事掛朝簪
憑眺因高盡虛明與水宜
綠蘿垂雨幄叢篠冒風絲
鳥嶼通桃徑壺觴到習池
因知竹林下不減上皇時

昔年雲卧處尚有讀書臺
墨沼驚羣浴蒼苔鳥跡開
洞門扃館宇礪戶出風雷
誰識東山意曾招隱士來

姚元白以玉華石見遺兼枉高篇奉答一首

幔亭一片雪迢遞削孤峯
雲壑有千態丹梯知幾重
瑤華君輟贈金簡我遭逢
好駐壺中景他年煉玉容

同思伯攜酒訪文壽承辭以事弗果文有詩見貽

和答一首

長安纔日下猶阻使人來便欲籠鶯去空成騎馬迴尋
盟須夜雪留興待春杯莫謂青檀冷東風有落梅

和徐子與答郭次甫折梅相贈之作

何處來芳訊春風把一枝薄雲千澗暝深雪獨行時策
杖香隨至開尊影倒窺羅浮虛月色此地有佳期

同子與過善果寺訪吳約卿時濮陽二蘇在席得

臺字

稱心遊野寺，攜賞上春臺。
日色催停騎，花枝笑舉杯。
吏閒方外得，山好雪中來。
暫過雖乘興，翻成倒載迴。

雪中同約卿過子與

出關愁日暮，踏雪喜新晴。
酒挹青驄客，詩傳白雪聲。
徑花霑濕重，簷溜滴階平。
此日衝寒興，還因下榻名。

十三夜過蘇子川兄弟

殘雪留寒在，空庭占月多。
玉珂停上客，紅袖拂清歌。
劈

杏調香酪分杯試海螺謝家兄弟好隣並忝羊何

憶歸

久客念將歸重嗟筋力違
靡蕪長送客荷芟未裁衣
白首貧交少青山舊業微
傷心同海燕懶向畫梁飛

曉經西苑

玉樹曉青蒼瓊花接混茫
迴風吹雨氣曲磴落雲光
薜荔搖珠網芙蓉暗石房
魚龍無秘戲雙鷗鎖朦廊

送江山人遊岱岳

暫拂緇塵去將板岳頂行布裘經雪綻藜杖入山輕奇
字捫蘿識新詩望日成路人驚骨異疑是羨門生

過范子宣得山字

解鞍尋竹下逸客况同攀一榻成雲卧雙輪對雪山
籠鷺方點翰貫酒且開闕城市逃名得扁舟未羨閒

送董孟材

燕臺收暮雨楊柳變繁陰以我思鄉淚知君久客心
雲門攀岳近汶水到家深羽獵看成賦高標在桂林

同尹王二僚長夜直禁中

偶同金馬客，倬直鳳凰城。
景氣浮瓊島，春星麗玉衡。
繚垣踈樹色，曲水細流聲。
獨夜難成寐，齋心捧大明。

同楊邦彥徐子與過汝和雪舫集

芳菲不可度，幽意與誰論。
夜雪留孤舫，春花入酒尊。
風塵容倦客，湖海共清言。
興罷各分手，青山落蓊門。

韋園別子與得談字

賓御促征驂，離觴且共銜。
春風吹杜若，野日上松杉。
郡

外嵩高色尊前史漢談竹林吾黨在何必羨江南

張玄超諸子集借樹軒得春字

門多車馬塵行徑且逡巡滄海風期在長安冠蓋新燕
來茅屋雨花暗玉河春莫厭尊中酒青山別故人

蘇子川宅觀芍藥得枝字

為掩羣芳色開花獨後時青扶承露蕊紅妥出闌枝綽
約東隣子風流鄭國詩合惟還有恨名字是將離

送盛少府烈忠還長興

金門逢傲吏知住五湖潯洞壑蒼山遠雲門下箸深釣
舟移柳浪茶具在花陰倘遂抽簪興雙鳬共入林

次甫將遊北岳有期復過軒中同作

將還滄海上復共草堂眠藥籠金鷲蕊藜燈白雪篇浮
沈官自拙骭黷爾相憐三徑容歸去何須問俸錢

送梁思伯使雲間兼歸嶺南

尊酒促鳴珂雲間擁傳過王程千里遠秋色五湖多拜
手辭金闕淹情寄綠蘿鄉心將去雁隨爾渡關河

李伯承張玄超月下過軒中

竹簟因風敞蘿衣過雨披故人來此夜詞客況同時墜
葉驚風早歸禽選樹遲煩襟何用滌玄論自相宜

省中即事

蹉跎成白髮不敢歎為郎飽食知才忝高眠苦日長渴
思金井凍坐戀玉墀香不記頻來往藤花又過墻

送陳子野之崇仁

榮君非薄宦所貴在經奇山續匡君傳亭尋孺子碑行

藏多任性詞賦不逢時會看雙龍氣沖騰向赤墀

送梁彥國之灤州

擊筑悲難盡揮杯路向分山藏到海郡樹引入關雲才
大人稱屈時明主好文白麟奇木對前席待終軍

送李仲連任趙藩審理

桐葉隨王命丹書遣侍臣出關迎紫氣飛蓋起黃塵樹
擁叢臺月花餘鄴水春從來豪俠地授簡尚詞人

招姜主客宗孝王杜二舍人王項二文學吳沈劉

居四山人集借樹軒

蓬徑留嘉賞風塵得友生
白雲窺夜酒明月照鄉情
葉應孤砧響星浮萬堞平
歲華空荏苒莫厭管絃聲

帝鄉星漸改燕谷暖還遙
心事邀懽盡年華賴酒銷
花枝隨起舞月色破孤寥
聚散浮生易難忘是此宵

同王儀甫過水塘菴

入寺已昏黃紗燈照上方
寒冰膠積水清梵響空廊
頌酒襟期洽懷山夢寐長
不辭風雪夜攜手共雲房

得張廣平助甫書

經年傳尺素入手淚縱橫白髮生鄉國秋風到郡城著
書千古事作吏衆人名謫去方年少懷沙莫愴情

雨

時計吏後作

短日仍多雨輕飛似暗塵病逢寒食夜書寄故鄉人節
物頻年異衣冠後會新聖朝容拙宦又過五陵春

聞徐子與解汝寧太守

一麾猶未達多病遽隳官豈為才名誤終傷世路難河

濱歸客騎苔水濯塵冠猿鶴應相語空山得歲寒

上巳雨夜王儀甫吳約卿杜從殷見過時王將外

補

汎羽逢今夕春陰未有花鄉心隨去雁城柝亂棲鴉聚
散京華夢飄零漢使槎朋知青瑣滿前席莫言賒

李伯承將之謫所同吳約卿歐楨伯攜酒過訊

星斗正闌干春風夜復寒歸心牽濮水別酒共長安流
落詩名在驅馳吏道難莫言捐玦易曾著鵷鷺冠

送王正意之任懷慶

不薄王門吏知君屬數奇圖書觀落日車騎入梁時沙
覆經秋草風高積雪枝河隄回首處碣石暮雲垂

約卿授館楨伯攜酒過訊

風塵疲上謁幽興屢難忘斂屐穿深竹移尊過草堂流
塵經雨淨微月逗雲光誰下南州榻相憐有異鄉

過劉刑曹仲恭出先世所藏名賢翰札相示

華省歸常晚明燈坐不遲雨涼新草徑風靜落花枝物

論中朝在文章故老貽西園叨勝引清夜可無詩

佛日過顧汝和觀柳公權書蘭亭禊帖同許元復

文壽承姚元白集

欲尋修禊事屢問辟疆園車馬塵方靜鶯花日稍暄饌
蒲供早食班草對清尊莫謂過逢易三生此共論

楨伯以西山紀遊諸篇見示因書其後

聞追金馬客振錫萬峰陰西嶺元天竺東來是佛心梯
樓還見日絕壑更捫參歸詫風塵士探珠自寶林

遷居

沈冥無所適燕市又移居廡下從棲泊蓬門倦掃除炎
風時展簟涼月乍窺書猶說金張第登龍日不虛

得家報云嶺外焦旱殊甚深有漁樵之憂賦此

近得家園信羈人易愴情四郊多壘戰三月廢農耕婚
嫁謀多拙漁樵計未成誰憐炊桂者猶自滯秦京

同許長史殿卿姚鴻臚元白歐文學楨伯遊鄭氏

園池

何處移觴得欣逢出郭晴林光披霧遠樹色入池清喜
客禽爭聒穿花日遮明雖然萍水地攜手一交情

逼仄緇塵裏茲遊屬興奇梯雲花落樹伏檻水平池暝
色催歌起涼風返棹遲分攜還此日須憶桂叢枝

姚元白將還金陵同顧汝和兄弟歐楨伯過訪

伏熱應難避幽尋重有期蓬門經雨靜旅館見花遲世
路歸能早才名宦獨卑飄零五湖約杯酒又何時

約卿自邯鄲回同楨伯過訊留酌出示張助甫所

寄書

三徑促行杯單車遠道回涼風披菡萏深夜坐莓苔洛
水雙魚至晴天一雁來碧雲何處所乘月故徘徊

約卿自北岳回以廟碑見貽

絳節凌虛上行吟已日邊樹窮沙磧外石墮寺門前雲
氣扶雙鳥冷風下列仙相逢嵇叔夜猶枉紫苔篇

獨坐

觸熱還騎馬乘閒即掩扉鄉愁來伏枕雨氣入秋衣薄

祿勝漁獵貧家望葦薇簡書聞遣將為解揭陽圍

七夕約卿攜酒邀過楨伯館

北斗拂闌干涼風下露寒新妝初學鳳彩女正乘鸞別
恨良宵促來期隔歲難誰憐金屋裏猶倚桂華看

雨夜姚元白歐楨伯攜酒過訪

杯酒銷餘日茆齋坐夜清疎砧風外急孤燭雨中明鄉
國傷多事浮沈笑此生問奇吾轉愧難得是交情

楨伯館同詠秋雨得青字

蕭颯含悲思那堪倦客聽風烟驅慘淡木葉應飄零遠
樹先浮白重巖驟失青停雲無濁酒誰為遣沈冥

助甫夢與余泣別見寄

謫宦人情異新秋景物悲別離如昨日少壯豈前時易
水風猶慘闕山月屢虧故園嵩洛畔攜手莫教違

伯常攜酒過訪僦居

載酒蓬扉下烽塵正此時將軍勤破敵野客廢談詩久
坐叢花爛狂歌白纓歌邊塵猶未靜吾敢道歸期

奉命至西山墳園

回首長楊苑風霜始覺秋青山低卷幔寒日淡披裘楊
柳無村落菰蒲有釣舟佩魚雖漢使還得采真遊
宿草經春長新阡近郭多彩銷團扇粉香盡舞衣羅陌
上花如綺雲間月似蛾繁華今不見遺恨雍門歌

陳侍御道襄宅離夜遇雪得零字

把袂風塵日燕歌且共聽客心寒易愴離夜酒長醒蕉
荔經持節江湖感聚萍黃金交誼少垂白任飄零

陳憲使少巖之西越附寄舍弟書

偶逢銅柱使一寄嶺南音鄉思楚雲碧江帆灕水深名
途誰薦士歧路我沾襟不似西飛雁隨君到桂林

歐楨伯館夜別梁彥國還盧龍

東閣多奇士諸侯有辟書豈知殘歲別仍卧茂陵居絕
塞燒荒後孤城雨雪餘飄零今夜酒難與故人踈

閱軍池河度清流關

赤符曾破敵紫氣復臨關千古興亡地中原指顧間浮

雲隨馬策落日照刀環遠愧輕裘者銘功上岷山

同盛仲交宿黃崖嶺

荒村無雨蓋枕藉向田廬汲水初蒸黍燃肪可照書山
雲遮戶密松韻過窓虛寄謝牛衣客勞勞且駐車

閩警

干戈愁越駱閩海更堪憐篁竹頻依險鯨鯢共戴天未
收熊耳甲莫費水衡錢痛哭謀臣疏珠厓肯棄捐

得仲弟西越書云有挂冠之興予亦請告期暮春

可聚故園賦此訂約

北闕無媒者南音只自操
向人肝膽露為吏愛憎勞
藥餌丹砂少山林白霧高
故園茆屋在相見接春醪
銅符如可解皂帽肯歸遲
迂拙人皆笑功名我自疑
花應團北戶烏亦戀南枝
何必山陰守將歸發誓辭

聞吳明卿上計以禁例不得相晤賦此寄懷

流落閩中使生涯近始聞
淚收江北雨身老越南軍
積思生春草新愁隔暮雲
倘攜延水劍猶可報明君

墜馬卧疾遣悶

寒冰方內手蹇劣亦長驅豈意千金堰翻成九折途過
門勞客問策杖待人扶試探囊中俸東隣酒肯沽

明卿自閩至晤於吳約卿官舍

一自遊梁後相逢又郭門酒因多病廢詩許故人論霜
雪驅單騎星河望九閭莫談江海事羈客恐銷魂

曾子玉比部召飲同楨伯集

歲晏驅羸馬過逢亦少期偶從官閣裏共和法曹詩掃

葉當風牖銜杯摘露枝琳琅欣觸目留醉願歸遲

姚元白自金陵至遇於慈仁寺方丈

共憐千里約還向五陵逢行徑尋黃葉棲禪問雪峰詩
篇新滿紙旅思夜聞鐘君看雙班髻知余萬事慵

同蘇子川歐楨伯訪吳化卿姚元白於慈仁寺

二仕逃禪處人誰訪薜蘿穿林驚雪重梯閣見山多候
騎花間並棲禽竹下過雲房未寥寂紅燭對清歌

送姚元白考績還金陵

賜烏旋南省歸軒背北風故人青瑣隔江月白門空酒
熟逢殘臘花開覓舊叢因君憶鱸膾攜手問江東

曾子澄過訪招楨伯同集時子澄將之塞上

論交千里日不獨旅情親夜燭長安酒征衣北地塵榮
途吾白首風景是殘春欲贈無奇策西秦別有人

亦知分手易杯酒問前期怨別難成賦從軍更有詩孤
鶯將薄曙殘露尚明枝回首天山夜聞笳憶此時

孔子河逢劉德卿

高士藏真處門迎孔子河青山經楚暮涼雨到江多白
髮生行路清樽對放歌迴車千古意今日共蹉跎


秋夜山亭答潘少承

別離欣把袂披寫共登樓木葉千山雨蟲聲四壁秋酒
緣多病止榻為故人留已似嵇康懶那堪復遠遊

蘭薰香

嶺南有嘉卉曰樹蘭者枝葉扶疎高可尋丈春
秋始作花如穗氣甚清馥類今時所謂蕙者以

諸香雜薰之逾時則蘭氣盡入香中矣余之金陵姻友有遺此者偶盛仲交諸子過余出藝之咸詫以為奇也因述其狀併系以詩用仲交韻
嶺外多奇樹扶疎異澤蘭空山徒自媚中土不曾看色奪青綾被香宜紫箬冠攜來經萬里猶結故人懽



瑶石山人稿卷六